

**TEKS UCAPAN
YANG DIPERTUA
MAJLIS PERBANDARAN SEBERANG PERAI
PROGRAM TAKLIMAT PENGASINGAN SISA DI PUNCA
APARTMENT PERMATA,
23 SEPTEMBER 2016 (JUMAAT), 8.30 AM**

Yang Berhormat Dr. Afif bin Bahardin

Pengerusi Jawatankuasa MMK Pertanian dan Industri Asas Tani,
Pembangunan Desa dan Kesihatan merangkap ADUN Seberang Jaya

Yang Dihormati Ahli Majlis- Ahli Majlis

Majlis Perbandaran Seberang Perai

Yang Berusaha Encik Azhar

Pengerusi JKKK Simpang Empat

Ketua - ketua Jabatan

Penghuni - penghuni Apartment Permata

Rakan - rakan Media

Tuan - tuan dan puan - puan yang dihormati sekalian

.....
Assalamualaikum warahmatullahi wabarakatuh, Selamat pagi dan
salam sejahtera,

Para Hadirin yang dihormati sekalian,

Terlebih dahulu saya ingin merakamkan ucapan jutaan terima kasih kepada YB. Dr. Afif, JKKK Simpang Empat, Pejabat Pengurusan Apartment Permata, Penghuni-penghuni Apartment Permata dan juga staff MPSP kerana telah berusaha dan berjaya menganjurkan Program Taklimat Pengasingan Sisa di Punca.

Program yang akan dilaksanakan ialah taklimat pengasingan sisa di punca kepada penduduk setempat mengenai cara-cara dan kewajipan pelaksanaan dasar ini. Keterbukaan Pejabat Pengurusan Apartment Permata dan JKKK Simpang Empat dalam menganjurkan taklimat ini merupakan satu langkah permulaan yang penting untuk membentuk sebuah komuniti yang lestari dan sihat dengan mengamalkan pengasingan di punca.

Para hadirin yang dihormati,

Bermula 1 Jun 2016 yang lepas, pelaksanaan Dasar Pengasingan Sisa di Punca telah dilaksanakan di seluruh Negeri Pulau Pinang. MPSP bertanggungjawab dalam memungut sisa kitar semula bagi kawasan

taman perumahan sahaja. Bagi kawasan perumahan strata, ianya adalah dibawah tanggungjawab pihak Pengurusan / *joint management body(jmb)* / *management comitee (mc)*. Pihak Pengurusan / jmb / mc perlu dan memastikan agar dasar ini dilaksanakan dikawasan operasinya.

Melalui Dasar Pengasingan Sisa di Punca ini, semua penduduk di negeri Pulau Pinang dimestikan mengasingkan sampah mereka sebelum dilupuskan kepada dua kategori iaitu, barang kitar semula dan sisa baki. Kaedah ini merupakan pengasingan sisa di punca yang paling mudah. Kaedah ini dipilih kerana mudah dilaksanakan dan mudah diterima oleh masyarakat. Tanggungjawab pihak Pengurusan / jmb / mc adalah untuk menyediakan tong kitar semula agar penduduk / penghuni / penyewa dapat memasukkan barang kitar semula kedalam tong berkenaan. Hasil jualan barang kitar semula ini dapat digunakan semula untuk kegunaan faedah penduduk Apartment Permata.

Menguruskan sisa bukanlah satu kerja yang mudah, kerana ia memerlukan kerjasama antara semua iaitu penduduk dan pihak MPSP sendiri. Setiap hari, sekitar 1,800 tan sisa dari negeri Pulau Pinang dilupuskan di Pulau Burung dengan pecahan 1100 tan daripada MPSP

dan 700 tan daripada MBPP. Lama kelamaan, tapak pelupusan ini akan penuh dan tapak baru harus dikenal pasti dan disediakan untuk menampung sisa negeri. Mencari tapak baru di negeri Pulau Pinang untuk tapak pelupusan sampah baru adalah mencabar kerana tanah adalah terhad dan mahal.

Jika penduduk Seberang Perai boleh mengurangkan sisa sebanyak 50%, iaitu dari 1100 tan kepada 550 tan sahaja sehari, MPSP dapat menjimatkan RM11,110 *tipping free* dalam sehari. Kita sedia maklum, *tipping fee* bagi satu tan sampah yang dihantar ke Pulau Burung adalah RM20.20. Dengan pengurangan sebanyak 50% sisa ini, penjimatan dalam tempoh sebulan ke atas *tipping fee* ialah RM333,300 dan untuk setahun penjimatan MPSP akan mencecah RM4 juta.

Oleh itu, kita perlu meningkatkan kesedaran rakyat negeri Pulau Pinang untuk menangani sisa kita dengan lebih berkesan melalui pengasingan sisa di punca. Amalan untuk mengasingkan sisa baki dan bahan kitar semula ini boleh mengurangkan sisa yang dihantar ke tapak pelupusan seterusnya memanjangkan jangka hayat tapak pelupusan kita.

Kadar kitar semula di Pulau Pinang merupakan kadar kitar semula yang tertinggi di Malaysia iaitu 32% dan kadar kitar semula MPSP adalah 39%. Ini telah melebihi kadar sasaran iaitu 20% yang ingin dicapai diperingkat kebangsaan menjelang 2020. Walau bagaimanapun, kadar ini masih rendah jika dibandingkan dengan negara-negara maju.

Hadirin yang dirahmati,

Program pengasingan sisa di punca ini secara langsung dapat mendidik penghuni Apartment Permata khususnya dan masyarakat Pulau Pinang secara amnya untuk menjadikan pengasingan sisa di punca sebagai satu amalan harian. Bermula dari tempat kerja hinggalah ke dalam institusi kekeluargaan maka pengembelengan kedua-dua institusi ini pasti dapat menjadikan Seberang Perai dan sekaligus Pulau Pinang sebuah negeri yang mengamalkan sisa sifar dengan jayanya.

Jika warga Seberang Perai dapat mengamalkan pengasingan di punca, ianya akan menjadi satu tunjang utama dalam penjagaan alam sekitar yang lebih lestari dan hijau.

Sekian, Wabillahitaufik Walhidayah Wassalamualaikum
Warahmatullahi Wabarakatuh. Terima kasih.